

**Motorcykelinik eqqusseqqusseqqusaannginnerup atorunnaarsinneqarnissaanut naalakkersuisut sulissuteqarnissaannut inatsisartut aalajangiiffigisassaattut siunnersuut.**

(Inatsisartuni ilaasortat Knud Kristiansen og Siverth K. Heilmann, Atassut)

**Akissuteqaat**

(Ineqarnermut, Attaveqarnermut Angallannernullu Naalakkersuisoq)

**Siullermeerneqarnera**

Innuttaasut nammineersinnaanerit aalajangiisuulluinnartoq aammalu pisariaqanngitsumik killilersuinerit innuttaasut kiffaanngissuseqarnerannik killiliisartut kissaatiginanngitsut, Naalakkersuisut siunnersuuteqartut isumaqatigaat. Taamatuttaaq innuttaasut namminneerlutik assartuussinermi atortunik toqqaasinnaanissamut kiffaanngissuseqartariaqartut siunnersuuteqartut isumaqarmata Naalakkersuisut isumaqatigaat, taakkunungalu aamma motorcykelinik atuineq ilaavoq.

Kisiannili Naalakkersuisut isumaqarput qamuteralaat atorlugit angallanneq motorcykelit atorlugit angallannermut assersuunneqarsinnaanngitsoq. Tamatumunnga pissutaavoq qamuteralaat pingaartumik qaqqani sumiiffinnilu inoqanngitsuni angalanermi atorneqartarmata, motorcykelinilli angalaneq illoqarfinni aqqusinerni pisarluni, taamaalillunilu angallattut allat pisuinnaallu ajoqusernissaannut ulorianaateqarnerulluni.

Motorcykelinik inerteqquteqarnerup Kalaallit Nunaanni inatsimmi nr. 186-imi, 14. maj 1980-imeersumi atulersinneqarneranut, innuttaasut angallattullu isumannaatsuunissaasa mianersuunneqarnissarpiaa tunngavigineqarpoq – tassalu mianersuussinissaq sulii aalajangiisuunerpaasusaaq.

Siunnersuuteqartut namminneerlutik tikkuaanerattut inerteqquteqarneq atorunnaarsinneqassappat, tamanna motorcykelit motooriisa angissusissaannik killiliinermik kiisalu motorcykelertussat ukiuisa killeqartinneqarnerannik ilaqartinneqassappat, mianersuussinissaq taanna sulii naammassineqarsinnaassaaq. Siunnersuummi saqqummiunneqartutut 250 kubik-inut killiliineq aammalu ukiussarititaasut 25-inut killilerneqarnerat naammaginartuussanersoq sulii ap ingerlateqqinneqarnerani naliliiffigineqartussaassaaq. Killilersuutitut atuutsinneqalersut innuttaasut angallattullu isumannaassusaannut qulakkeerinissaat pingaernerpaavoq.

Tamatuma saniatigut Naalakkersuisut isumaqarput, isumannaallisaanermi iliuusissanik allanik sulissuteqarnissaq iluaqutaasinnaasoq, assersuutigalugu niaqorornaveeqqutit qitiarnaveeqqutillu, mingutsitsisoqarsinnaanerannik qulaajaaneq, ilanngullugu nipiliorneq, kuutsitsineq taamatullu motorcykelit mingutsitsisinnaanerit, aammalu akitsuusiisinnaanermut periarfissanik qulaajaaneq. Taamatuttaaq Danmarkimisut motorcykelinik ingerlatsisinnaanermut allagartalersuisoqassanersoq, taamaassappallu ingerlatsinissamut ilinniartitsisunik, sulii assamik taamaattumik tiguserusunnassanik peqarnerisooq paasinierneqassaaq.

Motorcykelit pillugit inatsit danskit inatsisaasa ataanniippoq, taamaattumillu – siunnersuut akuerineqassappat – Naalakkersuisut danskit oqartussaasuinut saaffiginnissapput, motorcykelinik eqqussisinnaanermut aalajangersakkat allanngortinneqarnissaannut periarfissat, tassungalu piareersarnissat il.il. kikkunnit ingerlanneqassanersut misissorneqarnissaat siunertaralugu.

Naggasiutigalugu ileqqorissaarnissaq eqqarsaatigalugu erseqqissaatigissavara, siunnersuuteqartut isummernerata akerlianik siunnersuutip akuerineqarnissaanut allaffissornikkut suliaasaqartoqartussaasoq Naalakkersuisut isumaqarmata.

Tassalu apeqqutit arlallit paasiniarneqartussaapput, taamaattumillu siunnersuut aappasaanneerneqannginnermini Inatsisilerinermut Ataatsimiititaliamit suliarisassanngortinneqarnissaa Naalakkersuisut inassutigaat.